

=====

Poetry of renowned Kashmiri Poets

Vasudev Reh

Transformed into Standardised Devanagari-Kashmiri by

M.K.Raina

31.12.2004

=====



वासुदेव रेह

१. शब गर्द

माने बूज़िव यिमन कलामन होशा होश
 आलव म्योन यि शामन शामन होशा होश
 दाय मे यी द्युन खासन आमन होशा होश
 आलव म्योन यि शामन शामन होशा होश

हे वुछ सॉ म्यॉन्य बेदॉरी ऑखुर मा त्वहि तार दियव
 पथ ब्रॉह वुछिनय नेंदुर अगर त्रॉविव थपलिस मा आर यियव
 वुमरि सॉबरोवमुत राविवु रछ खंड काँसि अगर व्यस्तार यियव
 हे वुनि मा छि कॅमी बदनामन होशा होश
 आलव म्योन यि शामन शामन होशा होश

म्योन सदा गव खॉलिस बायव होश हबा हुशयार हबा
 यथ समसारस नाहमवारस चारु दिनस छुनु तार हबा
 क्याज़ि रछुन आराम छु तवु किन्य आरामस छुनु वार हबा
 युथ नु ह्यमॅन्न हुंद त्रॉविव दामन होशा होश
 आलव म्योन यि शामन शामन होशा होश

यिनु सॉ आलव म्योन गछिवु कॅन्य पॅत्य तु यि बूज़िथ मॅशिरोविव
 यिनु पनुन अँज़्युक या पगहुक सॉचुन बेयिनुय प्यठ त्रॉविव
 यिनु सॅन्य चूरस दीनस दर्मस द्रियन तु कसमन कन थॉविव
 म्वखसर थॅविज़ि नज़र अंजामन होशा होश
 आलव म्योन यि शामन शामन होशा होश

यिनु कनु दोल दियिव क्रख बूज़िथ राय गछ्छयव असि क्या साँ हे
 यिनु ज़ॉनिव यि छु पर आलव अँस्य् पान रछव असि क्या साँ हे
 यामथ कांह गछ्छि नाराह दिथ, यिनु त्वहि बास्यव असि क्या साँ हे
 म्यॉन्य् यँहय क्रख शाहरन गामन होशा होश
 आलव म्योन यि शामन शामन होशा होश

ज़रि हना वख कूठ हसाँ वुछ साँ तामथ क्याह करि इनसान
 वुछ साँ यी मा रोज़ि दूहय यि छु दोराह अथ क्याह करि इनसान
 थफ थवस हेयि पथ पानय सोत सोत, न्यथ रोज़्या कथ, क्याह करि इनसान
 बायव होश यिमन अयामन होशा होश
 आलव म्योन यि शामन शामन होशा होश

बाहरॉल ती शुर्य ह्वक ची ची यिनु यारो मिसमार गछ्छिव
 नालु रँट्चून यि योवुन, वख यिनु अथु मंज़ु राविवु, फ्यार गछ्छिव
 सर्फस बीन गछ्छिव यिनु पर क्रख, नाहकु युथ नु करार गछ्छिव
 यिनु रेह ज़ालिवु माहरेन्य् खाबन होशा होश
 आलव म्योन यि शामन शामन होशा होश

★ ★ ★ ★ ★

=====

Poetry of renowned Kashmiri Poets

Vasudev Reh

Transformed into Standardised Devanagari-Kashmiri by

M.K.Raina

31.12.2004

=====